

國朝先正事略

國朝先正事略卷三十五 經學

平江李元度次青纂

朱竹君先生事略 手感

先生諱筠字東美一字竹君號笥河大興人文正公珪兄也年十三通七經十五與文正同補諸生負文名順天尹蔣公炳招劉文定編程文恭景伊錢文敏維城莊侍郎存與莊學士培因及先生兄弟飲試以崑山雙玉歌諸公激賞乾隆十九年成進士選庶吉士授編修二十六年分校會試丁父憂哀毀骨立先生素無宦情服闋欲徧遊天下名山已乞假矣

上召見文正詢家事曰翰林無定額汝兄當補官不比汝需缺

也。文正以告掌院索假呈歸曰：兄實無疾恐。

上再詰問不敢欺其強爲弟起。先生不答。旣而驟然曰：弟敗我清興矣。是年授贊善。明年大考擢侍讀學士。充日講官。知起居注。戊子分校順天鄉試。己丑分校會試。庚寅典福建鄉試。辛卯分校會試。是年秋提督安徽學政。安徽故多樸學先生。重刻許氏說文。以詔學者。謂爲學必先識字。躬拜奠婺源江永汪紱之主祀之鄉。賢以勸士。先生初爲劉文正統勸所知。以爲疏儒奇士。及在安徽會。

高宗下詔求遺書。先生奏言翰林院貯有永樂大典內多古書。世未見者請開局使校閱。且言搜輯之道甚備。時劉文正在軍。

機處顧不喜謂非爲政之要欲議寢之而金壇于文襄敏中獨
善先生奏與文正固爭執卒用先生說上之四庫全書館自是
開矣館開凡十有三年而書成共存書三千四百六十種計七
萬五千八百五十有四卷其得自永樂大典者凡五百餘部皆
世所不傳本也先生又請倣照漢熹平唐開成故事擇儒臣校
正十三經文字勒石太學

高宗手勅曰候朕緩緩酌辦未幾坐事左遷編修入四庫館纂
修日下舊聞時文正薨金壇總裁館事尤重先生會以館書稿
本往復辨析欲先生往就見而先生執翰林故事總裁纂修相
見於館所無往見禮又時以持館中事與意忤金壇大憾一日

見

上語及先生

上達稱許朱筠學問文章殊過人金壇默不得發第言朱筠辦書頗遲

上曰可令蔣賜榮趣之時蔣方以舊侍郎直武英殿也尋督學福建至閩以經學六書訓士口講指畫無倦容某生爲攝令某坐以殺人鍛鍊成獄先生雪其冤士林頌之逾年

上使文正代之歸數月遂卒年五十有三天性孝友博聞宏覽書無所不通說經宗漢儒諸史百家皆考證其是非同異古文法班馬而參以韓蘇詩出入唐宋不名一家先生既久次望益

重則大言翰林官以讀書立品爲職不宜修小禮曲意委順於達官貴勢顧篤好交遊一言之善稱道不容口卽有過輒覆掩之後進多因以得名陸君錫熊程君習芳任君大椿皆其所取士而黃君景仁洪君亮吉輩則北面稱弟子戴君震汪君中元傲不羣好雌黃人物在先生幕中獨無閒言孫君星衍以未見先生爲恨屬洪君爲紹願遙執弟子禮先生許之其督皖學也延名宿十二人司校閱聯鑣出國門賓從稱盛室中自晨至夕未嘗無客與客飲酒連舉數十觥不亂談笑窮日夜酒酣論天下事自比李元禮范孟博激揚清濁別邪正聞者悚然生平提唱風雅振拔單寒後進天下士歸之如市所居室曰柳花吟觴

亂草不除。雜花滿徑。聚書至數萬卷。金石文字千種。嘗對客屬
文。其文才氣奇縱。所欲言無不盡。尤愛山水。使車所至。嘗再登
黃山。武夷。峭壁不通樵徑。必攀蘿造其巔。題名鏤石而後返。所
著有筍河文集。子錫庚。字少白。乾隆戊申舉人。候選直隸州知
州。讀書好古。精左氏春秋。能世其學。先生高弟。自陸程任黃孫
洪外。有李威。字畏吾。龍溪人。戊戌進士。官廉州知府。深於六書
之學。著說文解字定本十五卷。

虞抱經先生事略 孫志祖 丁杰

先生諱文弼字弼弓號抱經其先自餘姚遷杭州父存心恩貢生召試博學鴻詞有白雲詩文集母馮氏山公先生景女也公生而穎異濡染庭訓又漸涵於外王父之緒論長則桑先生調元壻而師之馮桑二公皆浙中懋學之士故其學具有本原乾隆戊午舉順天鄉試壬午考內閣中書壬申以一甲第三人成進士授編修丁丑入直上書房由中允薦陞侍讀學士乙酉典廣東鄉試旋提督湖南學政戊子以學政言州縣吏不應杖辱生員左遷明年以繼母年高乞養歸先生好校書終身未嘗廢在館閣十餘年歸田後主講書院凡二十餘年雖耄孳孳無

怠昧爽起繙閱點勘朱墨並作几閒閣闕無置茗盃處日月暝始出戶散步庭中俄而篝燈如故至夜半而後卽安祁寒酷暑不稍閒宦俸脯修所入不治生產僅以購書聞有舊本必借鈔之有善說必謹錄之一策之間分別迯寫諸本之乖異字細而必工今抱經堂藏書數萬卷皆是也校讐之事自漢劉向揚雄後至聖朝極盛公自以家居無補於國而以刊定之書惠學者亦足以餽益右文之治出所定經典釋文孟子音義逸周書賈誼新書春秋繁露方言白虎通荀卿子呂氏春秋韓詩外傳獨斷諸善本鏤板行世又苦鏤板難多則合經史子集三十八種如經典釋文例摘字而注之名曰羣書拾補以行世所自爲

書有文集三十四卷。儀禮注疏詳校十六卷。鍾山札記四卷。龍城札記三卷。廣雅注二卷。皆能使學者從正。積非蓄疑。漸釋。先生治經有不可磨之論。其言曰。唐人之爲義疏也。本單行。不與經注合。單行經注。唐以後尙有善本。自宋後附疏於經注。而所附之經注。非必孔賈諸人所據之本也。則兩相鉏鋺矣。南宋後又附經典釋文於注疏間。而陸氏所據之經注。又非孔賈諸人所據也。則鉏鋺更多矣。後人必比而同之。則彼此互改多失。其眞幸有改之不盡。以滋其鉏鋺。啟人考覈者。故注疏釋文合刻。似便而非古法也。其讀書特識類此。乾隆乙卯卒。年七十有九。平生事親孝謹。喪繼母時。年七十三矣。居喪猶盡禮。待弟誦音。

極友愛。篤師友之誼。而性尤伉直。方壬申殿試時。對策中力言直隸差徭之重。

純皇帝爲勅。咨飭總督方觀承。申奏自劾。士論偉之。同縣孫志祖亦以著書爲事。志祖字詒穀。乾隆三十一年進士。官御史。所著讀書勝錄七卷。考論經子雜家。折衷精審。不爲武斷之論。家語疏證六卷。證王肅之僞。又著文選考異四卷。文選注補正四卷。補正姚之駟輯謝承後漢書五卷。又歸安丁杰字升衡一字小正。乾隆四十六年進士。官教授。肆力經史。旁及六書音韻。算數。長於校讐。於胡氏禹貢錐指。摘誤甚多。四庫館開。朱竹君戴東原皆延之助校勘。所著書曰周易鄭注後定。大戴禮記集小。

西山房文集

國朝先正事略

卷三十五

經學

六

邵二雲先生事略

邵先生晉涵字與桐一字二雲浙江餘姚人先生以禹貢三江其南江從餘姚入海遂自號南江浙東自陽明以道學顯而功業風義兼之念臺忠謹著大節其弟子黎洲覃研經史博洽於文辭先生生其鄉私淑三先生故性質貞亮而經經緯史涉獵百家不懈而進於古乾隆三十年舉於鄉典試者爲錢少詹大昕得先生文謂非老病不辦及來謁年裁踰冠叩其學淵博無涯溪少詹拊掌曰不負此行矣三十六年會試第一成進士

廷試二甲歸部銓選三十八年詔開四庫館時

高宗崇獎實學思得如劉向揚雄者任之大學士劉公統勳首

薦先生。特旨改庶吉士充纂修官。踰年授編修。五十六年遷中允。擢侍講。轉侍讀。歷左庶子。侍讀學士。充日講起居注官。直文淵閣。歷充咸安宮總裁。萬壽盛典。八旗通志。國史館三通館纂修官。又爲國史館提調。兼掌進擬文字。典試廣西者一教習。庶吉士者二。生平至性過人。執親喪哀毀骨立。與人交始終如一。未嘗以博雅自矜。惟以非義干者不待語竟。卽拂衣起。人以是嚴憚之。少多病。左目微眚。清癯如不勝衣。而獨善讀書。數行俱下。寒暑舟車未嘗頃刻輟業。於四庫七略無不研究。而尤能推極本原。實事求是。在館時總裁問以某事。答曰在某冊第幾葉中。百不失一。咸訝以爲神。蓋自元明以來。儒者務爲空疏。

無益之學六書訓故。屏斥不談。於是儒術日晦。雖間有能讀書如楊慎、朱謀埭者。非果於自用。卽安於作僞。立論往往不足依據。迨本朝興而樸學始輩出。顧處士炎、武閭徵君若璩、首爲之創。然奧窔未盡闢也。乾隆之初。海宇久平。已百餘年。魁儒鉅公接踵。惠徵君棟、戴庶常震其學識。始足方駕古人。及四庫館開。先生與戴君首膺其選。由徒步入翰林。於是士大夫始重經史之學。言經學推戴君言史學推先生。海內駸駸趨實學矣。然先生尤以浙東三先生爲宗。每上下古今。凡政治得失。人才消長。君子小人之元黃水火。皆能抉其弊之所由。始與害之所由終。尤熟於前明掌故。於朋黨奄禍及唐魯二王起兵始末。口

講手畫。往往出正史之外。每語一事。輒亟稱三先生不置。蓋其學之所本。又心儀其人。而欲取以爲法者也。豈徒以旁通訓詁。方名象數。及草木蟲魚之多識。謂足盡先生也哉。先生於經深三傳及爾雅。以宋邢昺爾雅義疏。蕪淺。遂別爲正義一書。以郭景純爲宗。而兼采舍人樊榭。劉李孫諸家。凡三四易稿始定。如以九府之梁山。卽今衡山。釋草紫莧。莧爲卽今款冬。同人皆歎爲絕識。又有孟子述義。穀梁古注。韓詩內傳考。並足正趙岐。范甯及王應麟之失。而補其所遺。當病宋史是非失實。又久居山陰。四明閒習。聞三先生緒言。剋爲南都事略一編。詞簡事增。過正史遠甚。嘗語人曰。南宋諸傳最無理法。其橐創於袁桷。倘與史

氏中外。故於甬東諸人多鄉曲之私。今讀南宋諸雜史及桷清容集。始知其論之確也。畢制軍沅撰續宋元通鑑。先生爲刪補考定之。制軍歎曰。今之道原貢父也。有方輿金石編目。皇朝大臣謚述錄。輟軒日記。南江詩文稿等書。所校官書如薛居正五代史。則採自永樂大典中。參以冊府元龜。太平御覽。并通鑑長編諸書。辨證條繫。悉符原書。一百五十卷之數。書成奏御。館臣請仿劉煦舊唐書之例。列於廿三史。刊布學宮。至分校石經。先生職春秋三傳。所正字體亦較他經獨多。爲文操筆立就。奧衍淵懿。學者宗之。卒於嘉慶元年六月。年五十有四。

戴東原先生事略 段玉裁 龔麗正

戴先生震字東原休甯人生十歲始能言書過目不忘甫授大學章句問塾師此何以知爲孔子之言而曾子述之又何以知爲曾子之意而門人記之師曰朱文公說也問文公何時人曰宋人孔子曾子何時人曰周人周宋相去幾何時曰幾二千年矣曰然則文公何以知其然塾師不能對自後讀書每字必求其義得許氏說文解字大好之遂盡通十三經注疏能全舉其辭嘗曰經以載道所以明道者辭也所以成辭者字也學者當由字以通其辭由辭以通其道某自十七歲時有志聞道謂非求之六經孔孟不得非從事於字義制度名物無由以通其語

言爲之數十年。灼然知古今治亂之源在是。宋儒譏訓詁之學。而輕語言文字。是猶度江河而棄舟楫也。時婺源江先生永治。經稱大師。先生年二十。以所學就正江先生。驚異之。齊侍郎召南見所作考工記圖。曰奇書也。年二十九。補縣學生。有族豪侵佔祖塋地。訟之。豪倚財結縣令。欲文致先生罪。乃脫身挾策入都。時紀編修昀。王編修鳴盛。錢編修大昕。王中書昶。朱編修筠。皆甲戌進士。以學問名。一時見先生。皆擊節歎服。遂館於紀氏。作勾股割圖記。秦文恭惠田延致之。與講觀象授時之學。五禮通考中全載其勾股割圖記。以集古今算法之大全。尋館王文肅安國家公子念孫。從受學。能得其傳。南歸。識惠先生棟於揭。

州時盧編修紹弓爲盧運使見會校刊大戴禮先生數指其謬
遺書與仕進士大椿論禮經舉康熙壬午鄉試是時秦文恭用
江慎修及先生之說疏請刊正韻書薦先生與錢君大昕任其
事。

高宗以相沿已久未允也先生以宋儒言性言理言道言才言
誠言明言權言仁義禮智言智仁勇皆非六經孔孟之言而以
異學之言糅之故就孟子字義開示使人知人欲淨盡天理流
行之語病於是作孟子疏證及原善論性諸篇嘗言朱子注大
學開卷言虛靈不昧便涉異學其言以具眾理應萬事尤非理
字之指古人曰理解者尋其賡理而析之也曰天理者如莊周

言依夫天理卽所謂彼節者有閒也。古聖賢以體民之情遂民之欲爲得理。今人以己之意見不出於私爲理。是以意見殺人。成自信爲理矣。中庸注言性卽理也。其可乎。論語開卷言學以明善而復其初。復其初出莊子絕非孟子以擴充言學之意也。其持獨見多類此。朱文正珪雅善先生爲山西布政使時。修汾州府及汾陽縣志。先生正舊志之譌。謂汾陽於漢爲茲氏縣。戰國時屬趙。不屬魏。漢時屬太原郡。不屬西河郡。後魏太和八年改六壁鎮置西河郡。治茲氏城。而西河之名移於此。酈道元注水經以武侯浮西河事繫之夏陽。子夏陵及廟室繫之郃陽。而於謁泉山及文水絕不涉及到。子夏設敎事張守節李吉甫輩。

始指爲魏之西河子夏退老居此皆非其實吉甫又謂黃初二
年於漢茲氏縣置西河郡卽今州治不知魏晉之西河皆治離
石非茲氏吉甫又謂周宣帝於此置汾州大業三年廢汾州不
知周隋之汾州皆非西河郡境吉甫元和郡縣志敘述最有法
而猶有外謬甚哉地理之難言也乾隆三十八年 詔開四庫
全書館于文襄敏中以紀文達的裘文達曰修之言薦先生於
朝

上素聞其名遂以舉人特召充纂修官首校水經注別經於注
正唐以來經注混淆之失

高廟褒嘉御製詩冠首蓋先生之受主知深矣乙未會試不

第

上命一體與殿試。賜同進士出身。授庶吉士。先生起自孤寒。獨以文學爲。

天子所知。出入著作之庭。館中有奇文疑義。輒就咨訪。先生爲考究。頗未各得其意。以去晨夕。討論靡闕。寒暑竟以積勞致疾。卒於官。年五十有五。時四十二年夏五月也。先生所校定官書。自水經注外。曰周髀算經。謂此古蓋天之法。自漢迄元明。皆主渾天。明時歐羅巴入中國。始稱別立新法。其實皆出於周髀。所謂天子失官。學在四夷者也。曰孫子算經。張邱建算經。夏侯陽算經。五曹算經。海島算經。五經算術。九章算術。皆王寅旭謝時。

臣梅定九諸公所未見者先生悉心備正

高宗皆製詩題卷首刊行而古九數之學大顯矣曰儀禮釋宮
儀禮識誤儀禮集釋項氏家說蒙齊中庸講義大戴禮揚子方
言皆能正其闕誤所自著書曰原善三卷孟子字義疏證三卷
勾股割圓記三卷策算一卷原象一卷考工記圖二卷聲韻考
四卷聲類表十卷文集十卷續天文略二卷水地記一卷方言
疏證十三卷毛鄭詩考正四卷考正鄭氏詩譜一卷果溪詩經
補注二卷大學補注一卷儀禮考正一卷歷問一卷古歷考二
卷六書論三卷爾雅文字考十卷屈原賦注九卷孔戶部繼編
爲刊戴氏遺書弟子段君玉裁復刊之先生無他嗜好惟專力

於讀書雖詞義鉤棘難曉者一再讀之輒渙然冰釋旁觀驚爲宿悟要由精誠所致其學長於考辨每得一義初若創獲及參互考之確不可易後儒多言易亂於費直先生以漢書證之曰藝文志易經十二篇施孟梁邱三家十二篇者經上下二篇十翼十篇此三家所同也儒林傳云費直易無章句徒以彖象繫辭十篇之言解說上下經蓋費氏不自立章句其解經卽用十篇之言而十二篇之目未嘗改後人誤讀儒林傳輒咎費氏之改經不察之甚也周禮大馭右祭兩軹祭軌注云故書軹爲軹杜子春云軹當爲軹軹謂兩轉或讀軹爲簪笄之笄先生辨之曰軹當讀如笄杜君改爲軹與軹內之軹二名混淆非也以特

釋穀端之軒亦非也。輶者車輪。軒者轂末。輶者軸末。後代字書并軒字無之矣。祭軌字。刊本多譌爲軌。毛公釋詩云：自軌以上爲軌。說文：軌從九，車輶也。軌從凡，車式前也。依詩意，宜音范。以韻考之，又不合。疑漢時軌軌二字相溷。毛公殆誤併爲一歟。其述明堂之制曰：明堂五室十二堂。故曰明堂。月令：中央曰太室，正室也。一室而四堂。東堂曰青陽，太廟南堂曰明堂，太廟西堂曰總章，太廟北堂曰元堂，太廟四隅之室。夾室也。四室而八堂。東北隅之室，元堂之右夾，青陽之左夾也。其北堂曰元堂，右个。東堂曰青陽，左个。東南隅之室，青陽之右夾，明堂之左夾也。其東堂曰青陽，右个。南堂曰明堂，左个。西南隅之室，明堂之右夾。

總章之左夾也。其南堂曰明堂。右个西堂曰總章。左个西北隅之室。總章之右夾。元堂之左夾也。其西堂曰總章。右个北堂曰元堂。左个凡夾室前堂。或謂之箱。或謂之个。左氏傳。賓饋於个。杜云。个東西箱是也。个者兩旁之名也。古者宮室之制。前堂後室有夾。有个有房。惟南嚮一面。明堂四面闢達。亦前堂後室有夾。有个而無房。禮婦人在房。明堂非婦人所得至也。四正之堂皆曰太廟。四正之室共一太室。故曰太廟太室。世之言明堂者。有室無堂。不分个夾。失其傳矣。春秋昭二十二年十月。王子猛卒。而其夏秋已兩書王猛。說者莫得其解。先生曰。王猛與鄭忽皆以國氏者也。王者諸侯目王。纖之辭。非天子之號。春秋凡書

王猶列國之書其國。書天王猶列國之書爵。故王人與列國書人同爲微者。王猛與鄭忽同爲以國氏。忽未卽位而出奔。歸不得書爵。書世子正其復國也。王子猛未卽位稱王。故卒稱王子。若先正其號曰王。不得復稱王子矣。今人所用三角八線之法。本出於勾股而尊信西術者。輒云勾股不能御三角。先生折之曰。周髀云。圓出於方。方出於矩。矩出於九九八十一。三角中無直角。則不應乎矩。無例可比矣。必以法御之。使成勾股而止。八線比例之術。皆勾股法也。又言治經宜自爾雅始。如釋言。桃充也。六經無桃字。鄭注樂記。孔子閒居。皆訓橫爲充。橫桃古通用。書光被四表。漢書引作橫被。今孔傳猶訓光爲充。文譌而義不

殊也。釋言：麻廕也。卽詩不可休思之休。釋木：桑柳醜條。卽詩蠶月條桑之條。莊子云：已而爲之者已而不知其然。當從釋詁解已爲此。其考證通悟類此者不可枚舉。璿璣玉衡爲古觀天之器。久失其傳。先生神悟於二千年後。令巧匠爲之。且詳其制於原象篇。所繪地圖尤精核。國朝言地理者有願景范。顧亭林問百詩。胡觴明。黃子鵠。趙東潛。錢竹汀諸家。然皆以郡國爲主。而求山川先生則以山川爲主。而求郡縣。故精審能出其上。歿後十餘年一日。

高宗校刊石經。命小璫問南書房諸臣。戰震尙在否。對曰已死。

上歎息久之。先是總督方恪敏觀承聘先生修直畿河渠書百
十一卷。未成而恪敏薨。蒙蘇周制軍元禮家嘉慶己巳吳江王
履泰以貲爲通判。得書。攘爲己有。刪其半。益以乾隆己丑以後
事實。易名畿輔安瀾志。進於朝。

仁宗謂此有用之書。命武英殿刊行。賞履泰同知。發永定河
試用。先生嗣子仲孚。攜原藁入都。欲爲辨正。不果。亦可見先生
經世述作。身後猶見賞於朝廷云。

段先生玉裁。字若膺。一字懋堂。金壇人。東原高第弟子也。年十
三。受知學使尹元孚先生。爲諸生。授以梁谿高愈所著小學。遂
究心焉。乾隆庚辰舉人。貴州玉屏知縣。越三年。改四川巫山知

縣辛丑引疾歸遂不復出生平講求古義精小學著書滿家行世者有說文解字注尚書撰異毛詩傳小注詩經小學錄經韻樓文集其女夫曰龔麗正字闇齋仁和人嘉慶丙辰進士官郎中以懋堂爲師能傳其學著有國語韋昭注疏

孫淵如先生事略

先生諱星衍字淵如江蘇陽湖人父勳舉人官河曲知縣大母許夢星陞於懷舉以授其母金比旦遂生先生幼有異稟書過目成誦河曲授以文選全誦之未冠補諸生與同里楊君芳燦洪君亮吉黃君景仁齊名袁君枚曰天下清才多奇才少淵如天下奇才也遂相與爲忘年交先生雅不欲以詩名深究經史文字音訓之學旁及諸子百家皆通其義錢少詹大昕主鍾山書院深器之會陝西巡撫畢公沅招入幕府一時名宿踵至先生譽最高畢公撰關中勝蹟志山海經注校正晏子春秋及校刻惠徵君諸書皆先生手定乾隆五十一年朱文正珪典試江

國朝先正事略

卷三十五

經學

七

南在都與彭文勤元瑞約曰吾此行必得汪中孫星衍及摛遺卷得其經文策曰此必汪中也拆卷得先生而汪實未就試明年賜進士第二人授編修充三通館校理五十四年散館試屬志賦用史記劍舄如畏語大學士和珅疑爲別字置二等以部曹用故事一甲進士改部或奏請留館時和珅知先生名欲令屈節一見先生不往曰吾甯得

上所改官不受人惠也遂就職又編修改官可得員外郎前此吳文煥有成案或謂君一見當道卽得之先生曰主事終擢員外何汲汲爲自是編修改主事遂爲成例補刑部主事總辦秋審先生掃室焚香爲諸名士燕集之所高麗使臣樸齊家入貢

見先生所校古書。特謁先生書問字堂。額賦詩以贈。五十八年。遷員外郎。次年扈蹕五臺。逾年扈蹕天津。會大風。御舟阻。上改御步輦至行宮。先生約同僚步行卅里。赴宮門治事。特賜緞匹。五十九年。遷郎中。阿文成胡莊敏二公皆器先生。每有疑獄。輒令依古義平議。行所平反。全活甚多。甲有竊主財。逾貫詣其友乙。匿其數。以告分金。而逸。事發。乙得知情。藏匿罪人。罪應流。先生謂律稱知情。則坐乙。不知滿貫也。應以所知數坐。減問徒。大司寇詰以乙所言。無質證。如獲甲言。實告以逾貫。奈何。先生曰。此名例所謂通計前罪以充後數也。乙卒減徒。先生又言。律文稱囚者在繫之名。稱罪人者。犯事在官之名。今或未

到官輒名爲罪人或藏匿罪人問擬縱囚非正名之義湖廣有子護嫁母傷人至死獄勅下法司議或以嫁母期服減於母則護嫁母不得與母同科先生謂古者父在爲母亦期屈於所尊嫁母服期因宗子主祭非謂情當殺也引宋王博文請封嫁母又爲行服謂子無絕母理又引唐人座議凡父卒母嫁有心喪三年之制子無絕道故也護嫁母出母均當與母同議減闕殺罪甲有馳車犯乙者已當過失殺罪甲恐以無故馳驟車馬獲重罪介所知以兼金求免先生曰吾不受暮夜金也君罪止過失殺無爲人所誅甲慚謝去有孝子爲父報仇殺縣役坐死其父姊控部弟竇爲縣役逼斃請檢尸傷當道爲緩頰先生曰

吾豈能枉法殺孝子哉。其持正類此六十年。投兗沂曹濟道。先生以濟陰湯陵在曹南。其山西滎河縣湯陵。雖列祀典。實宋以來相沿之誤。因徧考諸書。據漢崔駰魏皇覽晉伏滔湯陵在濟陰之說。移山西布政司。並考滎河之陵。出後魏小說家言。張恩破陵得銘。附會殷湯。未爲典要。宜申大府改正。後再官山左。卒令曹縣令修葺湯陵廟屋。以祭田奉祀立碑紀事。嘉慶元年曹南水漫灘潰。決單縣地。先生偕按察使康君基田築塞之。鳩工集夫。五日夜。從上游築隄。遏禦之。溜歸中。滋不果橫決。康語先生曰。吾治河數十年。未見決口能卽堵閉者。曹南之役。吾與君成之。省國家帑金數百萬矣。尋署按察使事。以整肅吏治爲

己任。親問囚。定爰書。矜愼庶獄。甲與乙有姻。共飲。乙醉。墜火炕。吐燒酒。引火燄。灼爛至死。甲醉臥。不知。獻者以甲奪壺斟酒。有爭鬪形。擬鬪殺罪。先生曰。甲主。乙賓。奪乙壺。勸之飲。名奪。實讓也。改甲坐過失殺。出其罪。有婦因姦謀命獄。其婦某家妾也。夫遠出。主母惡之。會僕婦死。誣以謀毒。讞者又實以姦夫。言妾淫。主婦令僕婦守之。惡而行毒。已具獄。先生鞫婦。以某日歸甯。僕婦後二日。以子劊與夫爭。忿自盡。出冤婦於獄。囚有共毆人至死。過堂呼冤者。自言本緯夫。途遇有眾毆人。勸止之。不從而去。越數月。邑令忽拘訊之。酷刑誣服。下手毆人。先生詰以眾中有相識者。否。答曰。有舅氏某。爲縣役。在旁知狀。密拘縣役詰之。乃

因姦殺人縣令回護聽其屬甥認罪始以鬪殺傷輕緩其死上官駁詰改擬傷重入情實囚知死乃不承先生誠縣官乃以失察處分枉人命吾爲若救止陰禍也有詬訾婦女致死獄先生以事在一月前不得謂之忿激鞫得婦自與夫毆訾自經狀出其罪凡權臬七閱月平反數十百獄活死罪誣服者十餘人亦不以之罪縣官云縣官實不盡明刑律皆幕客誤之也山左風氣爲一變先生又以先儒伏生及鄭康成成功在傳經可比七子身通六藝皆宜立五經博士後大吏奏請鄭議格而伏允行其議自先生發也濰縣有武人犯法挾厚力求脫令不可干因賄通和珅門下屬託大府先生訪捕鞫之械和門來者於衢巡

撫不便其所爲因奏言河防任重宜令回本任

上俞之時各屬感先生廉正卻陋規相率集貲餽贍皆不納是年江南豐工及山東曹工同時漫溢先生以無工處所得疏防咎大府請嚴議

上以兼管官特予畱任故事道員嚴議無特旨予畱者異數也曹工分治引河三道先生與濟東登萊二道各治二十里先生治中段廣深中程嚴於寮弊不煩苛不染指畢工較上下段引河共省帑三十餘萬凡河工堵築決口須於將合龍時放引河則水疾下而無停淤時隄未大塞而巡撫欲放引河康河督力止之不得既放水河盡填淤於是復抽溝而曹工遂不能合

矣。四年巡撫奏先生熟習刑名操守廉潔惟河務非所長請以
守巡道留補得。俞旨先是河工分賠之員或得羨餘謂之扣
費先生不取悉以給引河工費仍取領結存庫是時曹工尚未
合河督及巡撫亟奏合龍移先生任尋又奏稱合而復開開則
分賠兩次壩工銀九萬兩當半屬後任司事者并責諸先生先
生亦任之曰吾無寸椽尺土然既兼河務不能不爲人受過也
未幾母憂歸僑居金陵六年浙撫阮公元闢詒經精舍於西湖
聘先生及王侍郎昶述主講席以經史疑義課士旁及小學天
部地里算法詞章各聽搜討書傳條對以觀其器識請業者盈
門未十年舍中士擢巍科入館閣及撰述成一家言者不可勝

數先生淡於宦情服闋後游吳越數年終以河工償項故不得已再出有旨仍發山東以道員用十年署登萊青道補山東督糧道山東衛河經臨清開口夏秋水漲高於開內之汶水卽閉閘謂之閘口糧艘阻滯先生知德州哨馬營及恩縣四女寺舊有兩支河合流入老黃河卽鉤盤鬲津故道經樂陵至海豐入海請開濬以洩衛水異漲德州舊設繭營駐防官兵五百口一口爲一戶增至二千七百餘口而額餉無可加每年例支道倉米七千八百石內有折色米三千餘石石支銀一兩糧價貴賤今貴折色不敷其半官兵日苦累而道倉支贖餘米厯年運交通倉需運費銀二千餘兩先生請以存給官兵本色除折色

不獨恤滿兵且省運費皆從之十二年署布政使事時侍郎廣興奉使山東供張煩擾先生憤守庫帑獨無所餽後廣以賄敗豫東二行省以支帑獲罪者眾先生不與焉十三年督運北上請訓

仁宗溫諭移時面奏乞假三月省迎老父於江南尤之抵江甯糾族眾建孫子祠回任自剡城取道費縣訪季桓子得獐羊井銘於縣署又訪曾哲南城葬處及澹臺子羽墓立碑季桓子井上始先生之官山東考太平寰宇記先賢閔子墓在范縣東今所傳在歷城者誤也曾徵縣令訪求遺墓迨嘉慶八年再蒞東省以察賑按行范縣會河溢不能詣墓所及官糧道忽夢浚井

出古丈夫自稱閔子覺而異之。因出貲屬縣令唐晟訪廢墓。申禁樵採。修祠堂。並訪義士左伯桃。羊角哀。墓於縣之義城寺東。皆爲文紀其事。十六年。引疾歸。尋客揚州。運署校刊全唐文。累主鍾山書院。生平立身行事。皆蹈儒術。廉而不刻。和而介。屢以剛正不獲於上官。早歲文詞華麗。繼乃沈潛經術。博極羣書。喜獎借後進。所至士爭附之。尤好聚書。聞有善本。借鈔無虛日。金石文字及古彝鼎書畫。皆能窮竟源委。文在六朝漢魏。閒不欲似唐宋八家。嘗病古文尙書爲東晉梅賾所亂。撰集古文尙書。馬鄭王注十卷。及逸文三篇。又爲尙書今古文注疏三十卷。蓋積二十餘年而後成。其專精如此。又有周易集解十卷。夏小正

傳校正三卷。魏三體石經殘字考一卷。倉頡篇三卷。孔子集語
四卷。史記天官書考證十卷。寰宇訪碑錄十二卷。平津館金石
萃編二十卷。孫氏家藏書目內編四卷。外編三卷。續古文苑二
十卷。問字堂文彙五卷。岱南閣文彙五卷。五松園文彙一卷。平
津館文彙一卷。詩集若干卷。所校刊者有周易口訣義六卷。尚
書考異五卷。春秋釋例十五卷。孫子十家注十三卷。元和郡縣
志四十卷。景德建康志五十卷。唐律疏議三十卷。卒於嘉慶二
十三年正月。年六十有六。配王恭人。名采薇。工詩書。有長離
閣集。

洪稚存先生事略 趙懷玉 莊圻 劉逢祿

洪先生亮吉字稚存陽湖人生六歲而孤家貧以師事翁卿
閒朱學士筠督學安徽先生從遊最久旋客浙江學使王文瑞
杰幕中資館穀養母母卒時方拔試處州弟謫吉不敢赴說
母疾甚趣之歸先生亟行距家二十里舍舟而徒方渡橋遇貨
僕之父仇三得家狀號踊失足落水中流數里汲者見疑與水
上攬之得人有識先生者昇至家久之乃甦以不及視含殮故
遇忌日輒不食年四十五成乾隆庚戌進士 賜第二人及第
授編修明年充石經館收掌官以舊書十三經多謬俗白紙裁
欲更正之未能從也王子分校順天鄉試闈中拜視學貴州之

命故事。詞臣未散館。無授學政者。異數也。在貴州。疏言。禮記宜以鄭康成注。易陳灝爲部議所格。教士以通經學古爲先。黔士向學先生有力焉。嘉慶元年入直上書房。先生初第時。大臣掌翰林院者。網羅人才。以傾動聲譽。先生知其無成。欲早自異。遂於御試。征邪教。疏內力陳中外弊政。發其所忌。隨引藹吉之喪。以古人有期功去官之義。乞病歸。其後座主朱文正珪有書起之。復入都供職。嘉慶己未。教習庶吉士。先生長身火色。性超邁。歌呼飲酒。怡怡然。每興至。凡朋儕所爲。皆掣亂之。爲笑樂。至論當世大事。則目直視。頸皆發赤。以氣加人。人不能堪。會有與先生先後起官者。文正公並譽之。先生大怒。以爲輕己。遂邑邑。

不樂復乞病。行有日矣。時川陝賊未靖。先生欲有所獻。皆願經檢例不奏。事乃上書成親王。暨當事大僚。言時事冀其轉奏。謂故貝子福康安所過繁費。州縣吏以供億致虛帑。藏故相和珅擅枋時達官清選多屈膝門下。列官中外者四十餘人。未復指斥。乘輿有羣小熒惑。視朝稍晏。語成親王以聞。有旨軍機大臣召問。卽日覆奏。落職交刑部治罪。先生就逮西華門外。都虞司羣議洶洶。謂且以大不敬伏法。其友趙中書懷玉見先生縲紲藉藁坐。大哭投於地。不能言。先生笑。字謂趙君曰。味辛。今見稚存死。邪何悲也。頃之承審大臣至。有旨毋用刑。先生聞宣感動。大哭。自引罪坐身。列侍從。用疑似語謗君父。大不敬。議

斬立決。奏上。免死。戍伊犁。將軍某妄測。

聖意。奏請。俟。君。至。獎。以。法。先。發。後。聞。得。旨。嚴。飭。不。行。明。年。京。師。早。詔。減。釋。軍。流。不。雨。朱。文。正。奏。安。南。黎。氏。二。臣。忠。於。其。主。久。繫。獄。請。釋。之。又。不。雨。

上。乃。手。詔。赦。先。生。是。日。沛。然。雨。遂。頒。諭。言。天。人。感。應。之。理。至。捷。誠。臣。工。弗。以。言。爲。諱。御。製。得。雨。紀。事。詩。有。亮。吉。原。書。無。違。礙。之。句。有。愛。君。之。誠。實。足。啟。沃。朕。心。已。將。其。書。裝。潢。成。卷。常。置。座右。以。作。良。規。之。注。

仁。宗。之。容。直。臣。超。越。前。古。而。先。生。諫。節。實。能。上。格。天。心。云。先。生。在。戍。所。不。及。百。日。自。獲。罪。至。戍。還。文。正。公。常。調。護。之。既。歸。自。

號更生居士。丁卯歲大祲。有司勅不成災。饑民剝樹皮以食。先生力請當道設賑局。捐金爲之倡。所全活數十萬計。性嗜山水。遊嵩華黃山。皆蹟絕壁題名。家居十餘年。卒。年六十有四。其學無所不窺。詩文有奇氣。少與武進黃景仁。仲則齊名。江左號洪黃。仲則客死汾州。千里奔其喪。世有巨卿之目。其後沈研經術。與同邑孫星衍季述論學相長。人又稱孫洪云。所著左傳詁十卷。公羊穀梁古義二卷。比雅十二卷。弟子職箋釋一卷。六書轉注錄八卷。漢魏音四卷。乾隆府廳州縣圖五十卷。三國疆域志二卷。東晉疆域志四卷。十六國疆域志十六卷。詩文集共六十四卷。行於世。趙君懷玉字億孫一字味辛。武進人。乾隆庚子

召試舉人授內閣中書出爲登州府同知好學深思書無所不讀工詩古文著亦有生齋詩文集同時爲漢學者有莊君所字虛庵乾隆戊子副榜官知州深於聲音訓詁之學校刻淮南子爲之注又有劉君逢祿字申甫嘉慶丁卯舉人淹通經傳皆先生同郡人

洪初堂先生事略

洪詒 程瑤田 羅永符

洪瑩

汪龍

汪炎

洪先生榜字汝登一字初堂歙人年十五爲諸生乾隆乙酉拔貢與兄樸同應召試兄授中書而先生未遇梁文定公國治時督學安徽皆賞異之先生從文定游至山西舉乾隆戊子鄉試丙申應天津召試冠其伍授內閣中書少與同郡戴東原金輔之交粹於經學因鄭康成易贊作述贊二卷又著明象未成書其解周易詁訓本兩漢行文類先秦又撰四聲韻和表五卷示兒切語一卷先是江先生慎修切字六百十有六是書增補百三十九字又以字母見溪等字注於廣韻之目每字之上以定喉吻舌齒唇五音蓋其書宗江戴二家之說而加詳焉又

著周易古義錄。書經釋典。詩經古義錄。詩經釋典。儀禮十七篇。書後春秋公羊傳例論語古義錄。初堂讀書記。初堂隨筆。許氏經義諸書。留心奇遁之術。以其術犯造物忌。病中舉所著火之。惟新安大奸紀龐久刊行。先生律身以正。孝友著於鄉。生平所學。服膺戴氏。戴氏作孟子字義疏證。讀者不能通其義。先生稱其有功於六經。孔孟之言甚大。使後之學者無馳心於高妙而明察於人倫庶物間。必自戴氏始也。撰東原行狀。載其與彭尺木書。朱竹君謂可不必載。戴氏可傳者不在此。先生上書論之詞甚辨。弟梧字桐生。乾隆庚子召試舉人。授中書。庚戌成進士。選庶吉士。由編修官沂州知府。博通古今工詞翰。亦邃於經。

學同邑學者有程易疇汪塾泉汪孝嬰羅子信洪賓華皆以經術名

易疇程姓名瑤田乾隆庚寅舉人太倉州學正著有通藝錄行世塾泉名龍乾隆丙午舉人著毛詩申成毛詩異義孝嬰名萊優貢生大學士祿康薦修國史天文志官石埭訓導十三經注疏能背誦如流水而又能心通其義有問者觸類旁通無窒礙尤善歷算通中西術著衡齋算學行於世子信名永符乾隆辛未進士選烏吉土善讀書通經史工詩古文時推疏儒奇士賓華名瑩爲初堂族子嘉慶己巳一甲一名進士賜及第授修撰恬於仕進五經各有撰述皆歛人

任子田先生事略

任兆麟
黃承吉

李惇
許珩

宋綿初
汪光燦

秦恩復
李鍾泗

任先生大椿字幼植又字子田江蘇興化人祖陳晉乾隆四年進士以通經聞著易象大意先生少工文詞既乃專究經史傳注乾隆三十四年二甲一名進士授禮部主事三十八年修四庫全書充纂修官禮經哀輯爲多提要多出其手尋以郎中授御史五十四年卒年五十有二先生家貧盡色養讀書守道義素不欲以空言講學服官行已無媿古人所學淹通於禮尤長名物著弁服釋例八卷深衣釋例三卷釋繪一卷吳越備史注三十卷小學鉤沈二十卷字林考逸八卷詩集六卷先生初欲著萃全經久之知其浩博難罄因思卽類以求一類既貫乃更

求他類所著深衣釋繪諸篇。皆博綜羣籍。衷以己意。或視爲爾雅廣疏。實禮經別記之意。學者能推其意。廣所未盡。以類窮之。可以會經之全矣。族弟兆麟。嘗采獲百五十條。爲字林考逸補。正云。兆麟字文田。一字心齋。震澤諸生。舉孝廉方正。嘗注夏小正本。鄭仲師周官注。移主夫出火一條。在三月。又移時有見穉。始收一條。在五月。又補入采芑雞始乳二條。王西莊序以爲。當所著曰有竹居集。時江北學者有李先生惇。號孝臣。高郵人。治經通敏。尤深於詩及春秋三傳。晚好厯算。通宣城梅氏書。與同郡劉端臨。王懷祖。汪容甫。善。力倡古學。篤內行。恂恂退讓。遇友朋患難。則執義不回。久困諸生。以高第將舉拔萃科試之前。

夕執友賈田祖死往經其喪遂罷試舉乾隆庚子進士注選知縣尋卒著歷代官制考考工車制考說文引書字異考左傳通釋杜氏長厯補渾天圖說羣經識小錄諸書又宋君綿初字守端亦高郵人乾隆丁酉拔貢官訓導邃經術尤長於說詩著韓詩內傳徵四卷子保字定之廩生精聲音訓詁之學又秦君恩復字敦夫一字澹生江都人乾隆丁未進士官編修讀書好古所居五筭仙館蓄書萬卷丹鉛不去手校刊陶宏景鬼谷子注盧重元列子注及隸韻諸書與人謙抑口不談學問是以世無知者又黃君承吉字春谷亦江都人嘉慶乙丑進士官知縣天資過人爲漢儒之學研究精微通厯算能辨中西之異同尤工

詩古文能自出機杼。空無依傍。又儀徵許珩者。字楚生。能詩治經。有心得。著周禮獻疑七卷。又汪君光燾。字晉蕃。儀徵諸生。父棟。進士官員外郎。與惠定宇。戴東原。王述庵。王西莊。錢竹汀。爲莫逆交。晉蕃承庭訓。夙聞諸老宿緒論。遂博通經史。嘗辨惠氏易爻辰圖之謬。又作蕘稗釋人服其精核。又李君鍾泗。字濱石。甘泉人。書一覽不忘。治經精左氏春秋。撰規規過一書。扣劉申杜焦里堂見而歎服。嘉慶六年舉人。與晉蕃皆早世。

孔塹軒先生事略

孔繼涵

郝懿行

鄭鴻磐

趙會

先生諱廣森字眾仲又字搗約號塹軒孔子六十八代孫居曲阜乾隆三十六年進士官檢討年少入官翩翩華胄一時爭與之交然性恬淡耽著述裹足不與要人通謁告養歸不復出及居大母與父喪竟以毀卒時乾隆五十一年也年三十有五先生聰穎特達經史小學沈覽妙解少受經於戴東原所學在公羊春秋唐陸德明云魏晉以來公羊久成絕學先生沈深解剝著春秋公羊通義十一卷於胡毋子都董仲舒何邵公條例師法不陞其自序曰昔我夫子有帝王之德無帝王之位又不得爲帝王之輔佐乃思以其治天下之大法損益六代禮樂文質

之經制發爲文章以垂後世而見夫周綱解弛魯道陵遲攻戰相尋彝倫或熄以爲雖有繼周王者猶不能以三皇之象刑二帝之干羽議可坐而化也必將因衰世之宜定新國之典寬於勸賢而峻於治不肖庶幾風俗可漸更仁義可漸明政教可漸興一於春秋乎託之春秋之爲書也上通天道中用王法而下理人情不奉天道王法不正不合人道王法不行天道者一日時二日月三日日王法者一日議二曰貶三曰絕人情者一日尊二曰親三曰賢此三科九旨旣布而壹裁以內外之異例遠近之異辭錯綜酌劑相須成體而傳春秋者三家粵惟公羊氏有是說焉漢初求六經於燼火之餘時則有胡毋子都董仲舒

皆治公羊春秋以其學鳴於朝廷立於校官董生授弟子臧公
臧公授眭孟孟授東海嚴彭祖魯國顏安樂各專門教授由是
公羊分爲嚴頗之學方東漢時帝者號稱以經術治天下而傳
士弟子因端獻諛妄言西狩獲麟是庶姓劉季之瑞聖人應符
爲漢制作黜周王魯以春秋當新王其說皆絕不見本傳重自
誣其師以召二家之糾摘矣然而孟子有言春秋天子之事也
經有變周之文從殷之實非天子之因革耶甸服之君三等蕃
衛之君七等大夫不世小國大夫不以名氏通非天子之爵祿
耶上抑杞下存宋褒滕薛邾婁儀父賤穀鄧而貴盛郕非天子
之黜陟耶內其國而外諸夏內諸夏而外四裔殆所謂天下之

本在國國之本在家者非耶。愚以爲公羊家學獨有合於孟子。乃若對齊宣王言小事大則紀季之所以爲善對滕文公言效死勿去則萊侯之所以爲正其論異姓之卿則曹羈之所以爲賢論貴戚之卿又實本於不言剝立以惡衍之義且論語責輒以讓國而公羊許石曼姑園戚今以曼姑擬皋陶則與瞽瞍殺人之對正若符契故孟子最善言春秋豈徒見稅畝伯於陽兩傳文句之偶合哉。晉唐以來公羊穀梁皆成絕緒唯左氏不絕於講誦啖趙橫興宋儒踵扇加以鑿空懸擬直出於三傳之外者淺識之士動爲所奪其訾毀三傳率摭拾本例而膚引例不可通者以致其詰董生不云乎易無達占詩無達詁春秋無達

例夫唯有例而又有不函於例者乃足起事同辭異之端以互發其蘊記曰屬辭比事春秋之教此之謂也十二公之篇二百四十二年之記文成數萬赴問數千應問數百操其要歸不越乎同辭異辭二途而已矣當其無嫌則鄭忽之正陳佗莒展之賤曹羈宋萬宋督之爲大夫未嘗不同號祭伯奔而曰來祭公使而曰來介葛廬朝而曰來齊仲孫外之而曰來未嘗不同辭入者爲篡天王入於成周乃非篡出者爲有外天王出居於鄭乃非外此無他正名天王灼然不嫌也夫人婦姜夫人氏夫人孫於齊則辭有異楚屈完來盟於師齊侯使國佐如師則辭有異衛侯言歸以成叔武之意曹伯言歸以順喜時之志而或加

復或不加復則同辭之中猶有異此言負芻出惡已見於伯討成公出惡未有所見也若是之屬有不勝僂指述者諸滅同姓莫名獨衛侯燬名諸葬稱公獨蔡桓侯不稱公諸來稱使獨武氏子毛伯不稱使一難而乃異一救而言次之先後異一人之名而曼何之有無異一年之內而糾與子糾異凡皆片言榮辱筆削所繫不可不比觀不可不深察春秋有當略而詳當詳而略詳之甚者莫如錄伯姬略之甚者莫如鄭蔡仲之事蔡仲權一時之計紆宗社之患君子取之亦與其進不與其退之意焉爾若左傳所載忽之弑躋儀之立仲循循無能匡救苟並存其迹將不可爲訓故斷至昭公復正厲公居櫟取足伸仲之權而

止此春秋重義不重事之效也。董生曰：正朝夕者視北辰，正嫌疑者視聖人。聖人以蔡仲、易君、季子殺母兄，皆處乎嫌疑之間。特殊異二子於眾人之中，而貴而字之，而不名，尙猶有援左氏之事以駁公羊行權之義者。蓋思仲之稱字，正逆知天下後世必有嘖嘖議仲者，乃大著其善也。孔子之修春秋也，至於上下內外之無別，天道人事之反常，史之所書，或文同事異，事同文異者，則皆假日月以明其變，決其疑。大抵以日爲詳，則以不日爲略；以月爲詳，則以不月爲略；其以不日爲恆，則以日爲變；以日爲恆，則以不日爲變；甚則以不月爲異，其以月爲恆，則不月爲變；以不月爲恆，則以月爲變；甚則以日爲異，將使學者屬辭。

比事以求之。其等衰勢分甚嚴。善惡淺深。奇變極亂。皆以日月見之。如示諸掌。善哉。自唐迄今。知此者。惟趙訪一人。哉。推舉其概。及齊平。及鄭平。平均平也。而一信一否。剗伯姬來歸。杞叔姬來歸。均出也。而一有罪。一無罪。月不月之判也。城楚邱之不嫌於內邑。以其月也。晉人執季孫行父。何以別於齊人執單伯。以其月也。晉人入曹。何以別於宋人入曹。以其日也。武宮亦立。煬宮亦立。而知季隱如之爲之者。以其不日也。諸侯相執例時。始見於宋人執滕子嬰齊。則惡而月之。公如例時。襄昭如楚。則危而月之。會例時。終桓公之篇。悉危而月之。可得謂無意乎。常辭偏戰日。詐戰不日。獨至於穀。詐戰而亦日。讀其經曰。辛巳。晉人及

姜戎敗秦於殽。癸巳葬晉文公。背殯之罪。口之而益見。復歸木。有言曰者。獨衛獻公口。讀其經曰。辛卯。衛甯喜弑其君剌。甲午。衛侯衍復歸於衛。諉弑之跡。亦日之而益見。春秋雖魯史舊名。聖人因而不革。必有新意焉。春者陽中。萬物以生。秋者陰中。萬物以成。善以春賞。惡以秋刑。故以是名其經。丙戌之再也。疑於衍而非衍。夏五或無月。十有二月或無冬。疑於脫而非脫。春以統王。王以統月。月以統日。春秋所甚重甚謹者。莫若此。世俗之說曰。譏貶當各就其事。而傳說有先事貶者。有終身貶者。得無乖論語不逆億之訓。且疾惡已甚乎。是未知春秋之用譏貶。當事而施者。小過惡耳。至於未事而先貶。既事而終絕。則蹈名教。

之宏罪犯今古之極。慈有雖孝子慈孫百世不可改者。中人之情固有始善終咎。先後易轍。惟若公子翬之媚桓弑隱。公子招之脅君亂國。充其惡可以至於此極。則平日處心積慮久已不範於禮義。先師言春秋天子之行事也。向使夫子與翬招並時立朝。必不待其弑君亂國。早已放流之。數殛之。又何不逆億之。有以誅不待教之罪人。而且使之出師。而且使之會諸侯之大夫。是則陳魯之君無知人之明。以自召其禍也。故貶招於鄆。貶翬於伐鄭伐宋。以戒後世之爲人君者。若曰有臣如此。則不可以長三軍而使四方。豈惟決二公子之辜而已。翬公子也。而勿謂公子招弟也。而弗謂弟存公子焉。若曰陳者弗良。當絕其位。

親者不良。但不當任之。亦弗可失其貴。此深中之深。微中之微也。俗儒不知春秋。病在不能探深窺微。輒在所傳聞之世。訟言貶之。遂在所聞之世。唯一貶於其卒。逮所見之世。隱如疑不得貶矣。然而辭不屬不明。事不比不章。昭公之篇。一曰隱如。至自晉。一曰叔孫舍至自晉。同事而氏不氏異。氏者賢。不氏者惡。亦因得見端焉。且遂卒而貶。猶夫終身貶也。春秋之義。人道莫重乎始終。用致夫人。弗曰其始。則終身不免爲篡。成風之含。昭會葬。王弗稱天。則終身不正其爲小君。其於追命桓公亦然。故輩招貶之於始。仲遂貶之於終。皆言乎罪大惡極。足以貫其沒世者也。議貶皆不概施。每就人情所易惑者而顯示之。法人莫知。

大夫不敵君而後以楚人書人莫知卿不得憂諸侯而後以晉人宋人書溴梁以降大夫交政未嘗貶也卻缺之徒義公子側之偃革宜若有善焉轉發其專平專廢置之罪而以人書不甯惟是又因是以知士匄公子結專其所可專得免於貶雖於名氏之外未有加焉固已榮矣鄭襄公背華附楚賤之曰鄭伐許與吳伐鄆狄伐晉文無以異至其子衰經與戎則正言之曰鄭伯伐許以爲不待貶絕爾第未若狄之顯也故襄公書葬悼公不書葬其葬猶之災也其不葬也猶前之接後之輪而蔡之肝也傳曰春秋不待貶絕而罪惡見者不貶絕以見罪惡也貶絕然後罪惡見者貶絕以見罪惡也又曰春秋見者不復見皆讀

此經之要法也。楚子虔哆哆然自以爲討賊而取絕於春秋。何則。般之弑父易見。虔之誘討難知也。名虔矣。般可以無誅乎。則又見諸絕世子有。絕有矣。蔡之臣子可釋恨於楚乎。則又見諸葬蔡靈公。以爲廬伸其復讐之志。凡義無常。唯時所當。方君義屬固。則般也。賊及君義屬般。則虔也。讐以其比在刺蔡館。譏猶釋王姬可以無逆。不可以逆而外之。遂不宜爲大夫。旣爲大夫。卽不得薄其恩禮。生殺不相悖。天以成其施。刑賞不偏廢。王以成其化。非春秋孰能則之。撥亂之術。譏於貶絕備矣。而又曰爲尊者諱。爲親者諱。爲賢者諱。惡如可諱。何以癉惡。聞之有虞氏。責德。夏后氏貴爵。殷周貴親。春秋監四代之令模。建百王之通

執尊尊親親而賢其賢尊者有過是不敢譏。親者有過是不敢譏。賢者有過是不忍譏。爰變其文而爲之諱。諱猶譏也。傳以諱爲賢。行爲譏重是也。所謂父子相隱直在其中。豈曲佞飾過之云乎。無駭貶去氏。故入極不嫌非滅。承徐人伐吳氏則滅項不嫌非齊。書成鄭虎牢於下。乃可以不繫鄭。書孟子卒於後。昭公取夫人乃可以不書其諱。文而存實有如此者。於紀侯大去見諸侯以國爲體。於入曹見同姓滅之當救。於公孫會見司寇有入議之祥。於防於暨於處父見君臣無相爲盟之法。其假諱而立義有如此者。世爭則示之以讓。世詐則示之以信。是以美召陵高法霍而於讓國公子三致意焉。衛子之諱殺也。捷之諱宋

也。三亡國之諱亡也。其緣賢者之心而隱惡。有如此者。將因其
所諱達之於不諱。則會璆成亂。以嚴君臣之分。乾時伐敗。以隆
父子之恩。子般忍日以正世。及之坊。然乃知祖之逮聞。所以爲
始爲將。推而遠之。而後得盡其辭。又炳炳彰彰如此。當病左氏
規隨擬議。續經三年。顧云齊陳恆執其君。寘於舒州。夫凡伯以
天子之使。諱不言執。况可加之其君乎。斥言成叛。抑非園棘取
運內邑不聽之例也。故曰左氏之事。詳公羊之義。長春秋重義
不重事。斯公羊傳尤不可廢。方今左氏舊學湮於征南。穀梁本
義汨於武子。惟此傳相沿以漢司空掾任城何休解詁。列於註
疏。漢儒授受之旨。藉可考見。其餘公羊墨守。穀梁廢疾。左氏膏

盲春秋漢議文謚例等。尙數十篇。惜無存者。解詁體大思精。詞義奧衍。亦時有承訛率臆。未能醕會傳臆。三世之限。誤以所聞始文。所見始昭。遂強殊鼻我於袂。而季姬季友公孫慈之日卒。皆不得其解。夫大夫奔例。時諸侯出奔。無罪時有罪月。內大夫出。無罪月。有罪日。功過之別。內外之差。宜然也。何邵公自設例。與經詭戾。而公孫敖之日。歸父之不日。兩費辭焉。叔術妻嫂。傳所不信。劭公反張大之。目爲非常異議。可怪之論。亦猶傳本未與輒拒父。雋不疑詭引以斷衛太子之獄。致令不曉者爲傳詬病。此其不通之一端也。七十子沒而微言絕。三傳作而大義明。春秋之不幸耳。幸其猶有相通者。而三家之師。必故各異之。使

其愈久而愈歧。何氏屢蹈斯失。若罔於包來下。不肯援穀梁以釋傳。叛者五人。不取證左傳。而鑿造諫。不以禮之說。又其不通之一端也。今將祛此二惑。歸於大通。輒因原注。存其精粹。刪其支離。破其拘窒。增其隱漏。冀備一家之言。依舊帙。決爲十一卷。竊名曰通義。胡母生董生。既皆此經先師。雖義出傳表。卓然可信。董生緒言。猶存繁露。而解詁自序。以爲略依胡母生條例。故亦未敢輕易也。昔韓文公遺殷侍御書云。近世公羊學幾絕。何氏注外。不見他書。聖經賢傳。屏而不省。要妙之義。無自而尋。非先生好之樂之。味於眾人之所不味。務張而明之。其孰能勤勤拳拳若此。固鄙心之所最急者。如遂蒙開釋。章分字斷。其心曉

然直使序所注挂名經端。自托不腐。其又奚辭。蓋自有唐巨儒。惜此傳之墜絕。而望人之講明也。如是。今殷侗之註已復不存。更以穴知孔見期推測於千百牘之後。安得有道如昌黎者而。就正其失也。鑽仰既竭。不知所裁。先生又著大戴禮記補注十。四卷。詩聲類十三卷。禮記厄言六卷。經學厄言六卷。少廣正負。術內外篇六卷。又喜屬文。工篆隸。著儀鄭堂駢體文三卷。江都。汪中讀之。歎爲絕手。

孔君繼涵字莊谷。翼軒之叔也。乾隆辛巳進士。官戶部郎中。深。於三禮。校刻微波榭叢書。同時有郝君懿行者。字恂九。棲霞人。嘉慶己未進士。官主事。撰山海經注。爲實事求是之學。又濟甯。

許君鴻磐字漸達進士官江蘇同知深於輿地凌次仲亟稱之其雪帆雜著皆辨駁地理之說不在臆明景范下與萊陽趙君齊名趙君名曾字北嵐乾隆己酉舉人官知縣好金石文字及古錢治經深於三禮及古文尙書左氏春秋皆山左翹楚也